

主 編 卞 甫

副 主 編 陳玉宇

明代基本史料叢刊·文集卷
(第二輯)

『洪武、建文朝』

三八

綫裝書局

林登州集序

閩文士自唐歐陽四門詹黃
御史滔以來其有專集行世
載在藝文志者指不勝屈而
林氏實居其半余昨歲承乏

來閩亟欲訪求此邦前賢著
述俾有所觀覽以為敷政寧
人之助物色久之見者絕少
詢之閩士大夫僉曰斯地屢
經兵燹緇素散佚故家大族

修為南面百城者悲為覆
醬補袍之用雖其子孫亦往
往不能有矣余為咨嗟太息
因誦放翁句云名酒勝於求
趙璧異書渾似借荊州斯言

雖戲實不誣耳居數月始得
明初詩人林子羽員外鳴盛
集鈔本不覺省舞命工繕錄
以寄吾鄉大司寇王先生一
日右麾林叅戎興手呈一編

即而視之蓋其先祖登州守
元凱先生遺集也按先生傳
誌及宋潛溪先生所撰集序
知先生以元末名儒受知英
主用薦擢為禁近官與金華

括蒼青田諸公纂修國初禮
樂書有明一代文章之盛實
自先生手開之至其兩使安
南綏遠懷貳歸途却金弗受
無陸賈寶劍之裝亮節清風

傾動當宁震服遐陬先生之
名且與日月並壽豈藉詩與
文以傳哉然即就其詩與文
論之有韻之言溫柔敦厚原
本忠孝又其為音冲和渾穆

淵淵乎清廟明堂之奏固將
與青丘分路揚鑣雖子羽猶
將遜之其他如鄭孟宣高廷
禮輩又不堪方駕矣古文辭
風格在史漢八家之間而自

出機杼絕不傍人門戶足以
行世傳後無疑先生舊有梅
雪齋集使南集續集等書其
槩曰登州集者從後所居秩
以名之也先是閩先正王而

弘中丞曾校刊先生全集歲
久漸失其板今叅戎所藏一
帙蓋僅而獲存亦可謂幸矣
叅戎恪守先澤將梓而新之
懇余為序余謏陋何足以為

先生重第表章文獻實余之
微志又喜先生之詩若文得
賢似續寶持而護惜之以流
傳無既是皆不可以莫之紀
也爰濡翰而識之簡端 省

府志

康熙丙戌皋月

賜

同進士出身通議大夫巡撫

福建等處地方提督軍務都

察院右副都御史長山李斯

義拜撰



原序

吾鄉文苑興於近代然而國初已有林元凱先生不知先生者或謂方當草昧海隅崛起漢孰我大耳其知先生者則曰懸隔中原砥行立名非附青雲安施後世予觀元凱蓋兩舍是當公之時括蒼王太史與公同使謂閩有公如毛之有鱗甲之有龜國初壇坫博大涵雅金華獨冠一代其序公集許可良至景廉伯仲屈指烏傷公集有喜子充見名之作子充集亦有贈公詩

子充者烏傷也閩海之士草昧之際崛起文苑
金華知之烏傷知之括蒼知之若夫奉使安南
所卻千金萬里之遠冥冥中夜竟能使高皇帝
知之後坐小法乃以其大者信之特書休問二
字自我砥立安在有所附而後施於世哉括蒼
論公所爲詩文皆雄偉軼宕清峻之語隻出塵
表有味乎其言之也凡詩若文清則易弱非有
一種邁往不屑之氣行乎其中安在其能雄偉
軼宕蓋公之峻生於清其雄偉軼宕生於峻清

而弱郊寒島瘦清而能壯則清之一字廼千古
詞人之脉之骨非獨蘇州襄陽一流至於十九
首亦云澄至清發至要焉爾古今之變每每自
清而趨麗枚叔蘇李清於建安晉尙清言而潘
陸已侈於曹劉三謝又侈於太康至唐而忽清
於齊梁所以爲初盛廼知骨脉之貴非不用故
實不用典要語之爲清也雖二陸三謝以逮齊
梁絢爛之極亦必有輕盈澄秀行乎其間但有
至有不至耳文心所至其志潔其行芳不屑一